

Juancho Pablo, un ehempel di disciplina y amor pa deporte

Condecorá pa Gobierno



Juancho Pablo

Aruba den su historia a conocé hopi futbolista di caliber halto. Cuanto di nos orguyonan no a defendé honor di país Aruba cu alma y curpa.

Entre nos orguyonan tin un cu ta ser considerá esun di mas grandi. Su nomber ta Juan Maximo Pablo nací na Aruba dia 18 di November di 1938 y nunca a bandoná su barrio di Dakota.

Juancho Pablo ta jiu di un famia dedicá na deporte specialmente na e deporte Rey...futbol.

Na edad di 10 aña Juancho a cuminzá anotá den e team hubenil di Dakota. Noa dura mucho cu Juancho a haya un posicion regular den Dakota, cual posicion tambe a bira amo y señor te na su retiro.

Juancho a bira capitan di su ekipo, seleccion di Aruba y tambe di seleccion di Antiyas. Su tiro fuerte a compensá Juancho cu e posicion di puntero derecho na inicio di su carrera, pa despues riba recomendacion di un entrenador Brasileiro e bai cubri e posicion defensiva central.

Su conviccion, caracter firme, deseo di gana y disciplina ta virtudnan cu a conducí Juancho den su carrera exitoso. Juancho por mira atras riba mas cu 50 wega internacional, un record cu ta hopi difícil di asercá,

menos superá. Juancho a hunga na Aruba, Boneiro, Corsow, Trinidad, Costa Rica, Mexico, San Salvador, Honduras, Venezuela, Surnam, Guatemala, Puerto Rico, Hulanda, Alemania y Dinamarca. Na Costa Rica Juancho a hunga den shete ocasion.

Deportistanan actual por tuma Juancho como ehempel. Un deportista tur afó, un persona discipliná, un cabayero tanto paden como pafó di terreno. Tambe mester remarcá cu Juancho nunca a wordo expulsá durante un wega deportivo, esey ta muestra un hungador ehemplar y su amor pa deporte. Na aña 1966 Juancho a keda elegí deportista di aña ASU.

Juancho a terminá su carrera riba 4 di April 1973 dia Dakota a gana Estrella terminando su carrera cu un victoria.

Despues Juancho a sigui cu su trabao di entrenador siguiendo cursonan na Mexico, Trinidad y Antiyas, pa despues por a dirigí su ekipo di Dakota y seleccion di Aruba pa ocho aña. Juancho no ta activo mas pa motibo di un lesion serio na rudiya. Juancho su éxito mas grandi den su carrera futbolístico ta día cu el a wordo selecta como e único hungador di Aruba den seleccion di Antiyas enfrentando Costa Rica y saboreando un victoria di 2-0 contra e seleccion Costa Ricense den un wega di eliminacion pa mundial.

E decepcion mas grandi di Juancho ta cu su ekipo no por a bira campeon di Antiyas. No obstante su decepcion cu su ekipo, nunca el a bandoná su ekipo di barrio Dakota.